



Proxecto de Decretode 2019, polo que se regula o réxime de conservación e explotación dos recursos marisqueiros

(versión 26/06/2019)

A Comunidade Autónoma de Galicia, ao abeiro do artigo 27.15 do seu Estatuto de autonomía, ten competencia exclusiva en materia de marisqueo e cultivos mariños.

En exercicio destas competencias aprobouse a Lei 11/2008, do 11 de decembro, de pesca de Galicia, modificada pola Lei 6/2009, do 11 de decembro, que establece que a política da Administración autonómica terá entre outros obxectivos, en relación coa conservación e a xestión dos recursos pesqueiros e marisqueiros, o establecemento e a regulación de medidas dirixidas á conservación, á xestión e a explotación responsable, racional e sustentable dos recursos mariños vivos. Entre as medidas de conservación e xestión que contempla dita Lei, figura a adopción, logo de audiencia do sector, de plans de xestión definidos como medidas reguladores da actividade pesqueira e marisqueira.

Os plans de explotación marisqueira tiveron o seu desenvolvemento normativo no Decreto 423/1993, do 17 de decembro, polo que se refunde a normativa vixente en materia de marisqueo, extracción de algas e cultivos mariños. Por outra banda, a explotación de recursos específicos realizárase a través de plans de xestión, segundo o artigo 158 do Decreto 15/2011, do 28 de xaneiro, polo que regulan as artes, aparellos útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia.

Dende os anos noventa a explotación dos recursos marisqueiros en Galicia organizouse principalmente a través plans de explotación anuais, mediante un sistema de coxestión entre a Administración e o sector. Os plans de explotación, xunto cos permisos de explotación para exercer a actividade e a organización do sector en torno ás agrupacións sectoriais das confrarías de pescadores, conformaron os piares para a importante transformación do sector marisqueiro, destacando a profesionalización das mariscadoras a pé, que contribúe á creación de emprego e ao desenvolvemento sustentable das zonas costeiras de Galicia.

Na última década cobra importancia a interdependencia da actividade marisqueira co estado ambiental do medio mariño, na medida en que o estado das poboacións dos recursos marisqueiros depende do estado do medio, ao tempo que a propia actividade contribúe ao mantemento das condicións do hábitat e da biodiversidade. Os plans de xestión encadran a actividade de marisqueo na Directiva marco sobre a estratexia mariña (DMEM), posto que durante o seu desenvolvemento obtense información relacionada con varios descritores, contribuíndo a determinar o bo estado ambiental das augas mariñas.



O marisqueo exercido a través dos plans de xestión, axústase a unha perspectiva sistémica porque a súa actividade mantén ou mellora a biodiversidade, fomenta o uso axeitado do territorio, adoita medidas de adaptación ao cambio climático, e se axusta ao concepto de infraestrutura verde.

Os plans de xestión de marisqueo teñen como obxectivo desenvolver unha explotación sustentable dos recursos. A viabilidade biolóxica dos plans de xestión realízase co o obxectivo de ter uns stocks explotados saudables en función de variables relacionadas coa estrutura de tamaños da poboación, así como da avaliación do volume do stock cando sexa posible.

O novo concepto de plans de xestión incluírá obxectivos biolóxicos, ecolóxicos, económicos e sociais a tres anos, niveis de referencia e indicadores para o seu seguimento. Os obxectivos requiren de prazos medios para que se produzan cambios de tendenzas, e por outra banda a súa evolución pode estar moi influenciada pola variabilidade ambiental ou económica, polo que un prazo de tres anos é axeitado para observar a súa evolución. Os plans de xestión manterán o enfoque baseado na coxestión e gobernanza dos recursos, coa participación do sector na súa elaboración e na asunción de responsabilidades na xestión sostible dos recursos.

Para dar resposta a novas iniciativas do sector relacionadas coa explotación dos recursos marisqueiros, como poden ser a xestión de novos recursos, novas zonas principais de traballo ou o emprego de novas técnicas ou artes regulamentarias, poderán aprobarse novos plans de xestión de vixencia inferior a tres anos, o que posibilitará determinar a súa viabilidade, antes de incorporarse como plans de xestión trianuais, as ordes que os aproban.

O desenvolvemento dos plans de xestión realizado polas xefaturas territoriais da Consellería do Mar posibilita o seguimento e avaliación continua dos obxectivos previstos nos plans. O grado de organización do sector marisqueiro, o persoal técnico do que dispón e o seguimento polos técnicos da Administración, propicia que non todas as actividades do marisqueo requiran de autorización previa para o seu desenvolvemento. As limpezas de algas ou elementos prexudiciais para o medio mariño, que son necesarias para evitar efectos negativos nos recursos, só requiriran de comunicación previa á Administración para poder realizarse.

Por outra banda, dentro das actividades de marisqueo que se poden contemplar nun plan de xestión inclúese a realización de turismo mariño polas persoas mariscadoras en apoio do uso sostible dos recursos.

O plan de xestión é un marco plurianual de medidas para a conservación e explotación dos recursos. As xefaturas territoriais, durante o desenvolvemento dos plans, poderán adaptar medidas en función da evolución dos obxectivos ou de que se produzan circunstancias que dificulten ou incrementen o potencial do plan. A flexibilidade do marco



plurianual mediante a adaptación das medidas realizarase por iniciativa da consellería, previa consulta co sector, ou das entidades titulares do plan de xestión.

Este decreto está formado por 24 artigos, estruturados en tres capítulos. O completan tres disposicións adicionais, catro disposicións transitorias, unha derogatoria e sete disposicións finais.

O capítulo I regula as disposicións xerais, nas que se establece o obxecto do decreto e o seu ámbito de aplicación, así como a finalidade e definicións legais.

O capítulo II regula a conservación e explotación dos recursos marisqueiros xerais e específicos. Se establecen as normas xerais para a explotación dos recursos, as normas de conservación e explotación para os recursos marisqueiros xerais e específicos, así como a regulación dos plans de xestión en canto a participantes, elaboración, contido e presentación, os plans de xestión de nova incorporación, e o desenvolvemento dos plans de xestión aprobados incluído a adaptación das súas medidas.

O capítulo III regula a extracción de moluscos cefalópodos, crustáceos e outros recursos, establecendo a existencia de normas para a súa conservación e explotación e a posibilidade de establecer vedas, así como a posibilidade de establecer normas para outras especies diferentes.

A disposición adicional primeira regula o período de outorgamento e renovación das modalidades de recursos específicos no permiso de explotación das embarcacións que actualmente era anual, adecuándose a plans de xestión trianuais. As habilitacións outorgadas ou renovadas nos anos 2019 e 2020 terán vixencia inferior a tres anos co obxecto de axustarse ao primeiro período de aprobación de plans trianuais de recursos específicos 2022-2024.

A disposición adicional segunda contén previsións en relación coa renovación das habilitacións para o exercicio do marisqueo a pé e dende embarcación, sinalando as actividades de marisqueo que computan para a súa renovación se así se recolle no plan de xestión, e introducindo como novidade as actividades de turismo mariñeiro. No caso dos permisos de explotación para marisqueo a pé, que se outorgan e renovan anualmente de acordo co artigo 40 da Lei 11/2008, do 3 de decembro, de pesca de Galicia, para a súa renovación terase en conta a actividade desenvolvida no ano natural anterior ao da solicitude, sen prexuízo dun marco de plans de xestión trianuais.

A disposición adicional terceira establece previsións en relación coa explotación de algas polas entidades de carácter económico nas mesmas zonas que as entidades de interese colectivo, coa finalidade de avaliar o impacto da actividade de explotación deste recurso no ecosistema antes de aprobar novos plans de xestión a entidades de carácter económicos distintos aos existentes.



As disposicións transitorias primeira e segunda establecen, respectivamente, un prazo de prórroga do Plan Xeral de Explotación Marisqueira para o ano 2019, e dos plans de xestión para recursos específicos para 2019. A finalidade da prórroga é realizar as adaptacións técnicas para a elaboración dos plans de xestión trianuais, continuando co desenvolvemento habitual da actividade marisqueira, e sen prexuízo de que se incorporen novos participantes nos plans prorrogados e se adapten medidas, de ser o caso. O período autorizado no ano 2020 para a extracción de recursos marisqueiros nas zonas de libre marisqueo non suxeitas a plan específico, axustase ao calendario dese ano.

A disposición transitoria terceira refírese aos prazos de presentación dos primeiros plans de xestión trianuais de marisqueo de recursos xerais para o período 2021-2023 e de recursos específicos para o período 2022-2024.

A disposición transitoria cuarta vai dirixida á presentación e aprobación dos plans de xestión de nova incorporación para os anos 2020 e 2021 para recursos marisqueiros xerais e específicos, e ten como finalidade que se podan desenvolver novas iniciativas de explotación polas entidades interesadas durante o período de tempo de vixencia prorrogada dos plans.

O decreto conta cunha única disposición derogatoria pola que se derrogan as disposicións de igual ou inferior rango que se opoñan ao disposto neste decreto, e en particular o título I e a disposición transitoria do Decreto 423/1993, do 17 de decembro.

A disposición final primeira modifica un artigo do Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia, suprimindo a regulación do período de actividade profesional marisqueira, que agora se contempla no presente decreto. A modificación favorece o desenvolvemento de actividades complementarias do marisqueo, que poden realizarse tódolos días do ano e facilita as labores de limpeza dos bancos marisqueiros que só requirirán de comunicación previa. Por outra banda, establece a posibilidade de que en situacións extraordinarias e datas de celebración sinaladas, semana santa e decembro, poda realizarse actividade extractiva en sábados e días festivos, sempre que a petición se recolla no plan de xestión.

A disposición final segunda modifica dous artigos da Orde do 15 de xullo de 2011 pola que se regula o permiso de explotación para o marisqueo a pé, relacionados cos requisitos para a renovación dos permisos de explotación de marisqueo a pé e a súa acreditación. Co obxecto de favorecer a renovación do permiso ante situacións que as persoas non poden prever ou evitar, computáranse os períodos que a persoa estivo inactiva por causa debidamente xustificada, non limitándose as causas de forza maior. A efectos de actividade suficiente para renovar a habilitación teranse en conta as actividades de turismo mariñeiro e a extracción de semente de mexillón cando coinciden cun día de actividade





extractiva, e ademais recoñecese como causas xustificada de inactividade o tempo empregado en labores de representación de postos de dirección das confrarías e federacións.

A disposición final terceira modifica once artigos da Orde do 30 de decembro de 2015 pola que se regula a explotación dos recursos específicos no ámbito da Comunidade Autónoma de Galicia. Os requisitos para a renovación dos permisos de explotación de marisqueo a pé para recursos específicos e a súa acreditación, modifícanse no mesmo senso que o indicado para os permisos de explotación de marisqueo a pé regulados pola Orde de 15 de xullo de 2011. Por outra banda, adáptanse os prazos relacionados co outorgamento e a renovación das modalidades de recursos específicos no permiso de explotación das embarcacións ao novo período de vixencia dos plans de xestión. A renovación das modalidades realizarse cada tres anos, polo que o período para acreditar actividade suficiente abarcará o período de tres anos naturais anteriores á solicitude, e terase en conta como actividade suficiente a efectos da renovación as labores de turismo mariñeiro e a extracción de semente de mexillón cando coinciden cun día de actividade extractiva.

O período para a elaboración e presentación dos plans de xestión modifícase podendo realizarse antes do 1 de outubro do ano anterior ao de inicio do plan. O desenvolvemento dos plans de xestión adaptase ás disposicións contidas no decreto, así o marco temporal das autorizacións da xefatura territorial que na actualidade era dun mes pode ampliarse ao período de tempo establecido nas resolucións de aprobación. Por outra banda, a necesaria flexibilidade nun marco de xestión plurianual a través da adaptación de medidas durante o desenvolvemento dos plans axustarase ao contemplado no decreto, e ademais establécense os requisitos para que as xefaturas territoriais realicen as adaptacións, ben de oficio previa consulta ao sector ou a petición das entidades.

A disposición final cuarta modifica 3 artigos da Orde do 20 de decembro de 2018, pola que se aproba o Plan xeral de explotación marisqueira para o ano 2019. As adaptacións das medidas durante o desenvolvemento dos plans polas xefaturas territoriais axústanse as disposicións do decreto e establécense os requisitos para que estas realicen as adaptacións. Por outra banda, modifícase o prazo de presentación dos plans de xestión que será antes do 1 de outubro, e a súa aprobación será mediante orde antes do seu inicio.

A disposición final quinta establece a habilitación para modificar as ordes modificadas polo decreto.

As disposicións finais sexta e sétima establecen, respectivamente, a habilitación para o desenvolvemento e a entrada en vigor do decreto.

De acordo co artigo 129 da Lei 39/2015, do 1 de outubro, do procedemento administrativo común das administracións Públicas, quedan suficientemente xustificadas os





principios de boa regulación seguintes: de necesidade e eficacia, porque esta norma e o instrumento máis axeitado para mellorar o sistema de xestión do marisqueo en Galicia, ao ampliar os períodos de vixencia dos plans de xestión e ao contemplar non só aspectos produtivos ou económicos senón tamén medioambientais, sociais e de emprego; de seguridade xurídica dado que se trata dunha norma que se insire con carácter estable no marco normativo autonómico; de transparencia xa que os potenciais destinatarios da mesma tiveron participación antes e durante o proceso de elaboración, e, finalmente, de eficiencia, dado que a iniciativa normativa non implica cargas administrativas innecesarias ou accesorias.

Na súa virtude, por proposta da conselleira do Mar, de acordo co Consello Consultivo, ou oído o Consello Consultivo, ou oído o Consello Consultivo e de acordo co voto particular formulado pola(s) conselleira(s) ou polo(s) conselleiro(s)...., e logo de deliberación do Consello da Xunta de Galicia, na súa reunión do día,

DISPOÑO:

CAPITULO I

Disposicións xerais

Artigo 1. Obxecto e ámbito de aplicación

1. Este decreto ten por obxecto a regulación do réxime de conservación e explotación dos recursos marisqueiros no ámbito das competencias da Comunidade Autónoma de Galicia.

2. As disposicións deste decreto será de aplicación ao marisqueo na zona marítimo-terrestre, nas augas marítimas interiores, no mar territorial e na zona económica exclusiva correspondente ao litoral de Galicia.

Artigo 2. Finalidade

A finalidade do réxime de conservación e explotación é garantir unha xestión sostible dos recursos marisqueiros tendo en conta aspectos medioambientais, económicos, sociais e de emprego.

Artigo 3. Definicións

Aos efectos do presente decreto aplicaranse, ademais das definicións establecidas no artigo 4 da Lei 11/2008, do 3 de decembro, de pesca de Galicia, as seguintes:

1. Recursos marisqueiros: especies de moluscos, crustáceos, tunicados, equinodermos, outros invertebrados mariños e algas, obtidos mediante o exercicio do marisqueo e susceptibles de comercialización.





2. Recursos marisqueiros xerais: especies de moluscos bivalvos e moluscos gasterópodos, non incluídos na categoría de recursos específicos.

3. Plan de xestión de marisqueo: marco plurianual de medidas reguladoras da actividade marisqueira que ten por obxecto desenvolver unha explotación sostible dos recursos, e que terá en conta aspectos de carácter medioambiental, social e económico.

4. Plan de xestión de nova incorporación: plan de xestión para recursos, ámbitos zonais ou útiles, equipos e técnicas de marisqueo regulamentarios, diferentes aos plans plurianuais de xestión aprobados.

5. Entidade de interese colectivo: calquera formula asociativa, de dereito público ou privado, constituída por produtores de base.

6. Stock saudable: stock dun recurso marisqueiro cuxa poboación presenta unha distribución de idades e tamaños equilibrada e que se atopa dentro duns límites biolóxicos seguros que garanten a continuidade no tempo da actividade marisqueira e da poboación.

7. Avaliación do volume dun stock: Estimación da biomasa total e comercial da poboación dun recurso marisqueiro nun banco ou conxunto de bancos marisqueiros.

8. Obxectivos xerais do plan de xestión de marisqueo: obxectivos globais aos que se aspira na actividade de marisqueo a través do plan, tanto no plano biolóxico e ecolóxico das poboacións explotadas e do seu hábitat, como nos ámbitos social e económico das persoas relacionadas coa explotación dos recursos.

9. Obxectivos operacionais do plan de xestión de marisqueo: obxectivos precisos nos que se concretan os obxectivos xerais, e que serán medibles, realistas e susceptibles de ser sometidos a seguimento a medio prazo. Poden facer referencia a tendencias, sen especificar valores concretos, ou incluír valores cuantitativos ou cualitativos, pero sempre estarán referidos a indicadores susceptibles de ser medidos e sometidos a seguimento.

10. Indicadores: variables con significado biolóxico, ecolóxico, económico ou social empregadas para medir o estado actual, a evolución e o grado de consecución dos obxectivos operacionais establecidos.

11. Niveis de referencia: valores dos indicadores a evitar ou a acadar no establecemento dos obxectivos operacionais ou na toma de decisións na xestión da explotación.

12. Estratexias de actuación: métodos, procedementos e/ou actuacións a pór en marcha para acadar os obxectivos operacionais establecidos ou para que os indicadores empregados no seguimento da evolución do plan tomen valores acordes con estes obxectivos.



13. Infraestrutura verde: rede estratexicamente planificada de zonas naturais e seminaturais de alta calidade con outros elementos medioambientais, deseñada e xestionada para proporcionar un amplo abano de servizos ecosistémicos e protexer a biodiversidade. As estratexias de actuación contempladas nos plans de xestión marisqueira aplican a restauración ecolóxica, non afectan negativamente á conectividade ecolóxica, e manteñen ou melloran os servizos ecosistémicos.

14. Argazos: as algas desprendidas do fondo por circunstancias naturais, que se acumulan nas praias e outras zonas do litoral.

CAPITULO II

Da conservación e explotación dos recursos marisqueiros xerais e específicos

Sección 1ª. Normas xerais de explotación

Artigo 4. Exercicio da actividade

1. A actividade de marisqueo de recursos xerais realizarase ao abeiro de plans de xestión ou en zonas de libre marisqueo no marco do Plan Xeral de Explotación Marisqueira establecido no artigo 9.

2. A actividade de marisqueo de recursos específicos, tanto en zonas de autorización marisqueira como en zonas de libre marisqueo, realizarase ao abeiro de plans de xestión.

3. Os plans de xestión poderán incluír as seguintes actividades de marisqueo: labores extractivas, actividades de semicultivo necesarias para a mellora da produción ou de recuperación de zonas, actividades de coidado, control, seguimento, protección e vixilancia dos bancos marisqueiros, e actividades de turismo mariñeiro realizadas polas persoas mariscadoras en apoio do uso sostible dos recursos.

Artigo 5. Plans de xestión de marisqueo

1. Os plans de xestión conterán medidas de conservación e explotación dos recursos durante un período de tres anos para unha explotación sostible dos mesmos nunha zona determinada, e incluírán obxectivos xerais, e obxectivos operacionais con niveis de referencia e indicadores para o seguimento.

Os obxectivos xerais e operacionais englobarán obxectivos biolóxicos e ecolóxicos relacionados co uso sostible e a longo prazo dos recursos pesqueiros, xunto con outros de carácter social e económico.



2. A xestión sostible dos recursos basearase na saúde dos stocks explotados e cando sexa posible, incluíra a avaliación do volume do stock das especies.

3. Os plans de xestión contribuirán:

a) A avaliar a consecución do bo estado medioambiental, a través dos diversos descritores da Directiva Marco sobre a Estratexia Mariña ou aquela normativa que a substitúa.

b) A unha perspectiva sistémica, na medida en que contribúan a mellorar a biodiversidade, fomenten o uso axeitado do territorio, inclúan medidas de adaptación ao cambio climático, e se axusten ao concepto de infraestrutura verde.

c) Á infraestrutura verde, cando favorezan ou manteñan servizos ecosistémicos, apliquen a restauración ecolóxica e non afecten negativamente á conectividade.

Artigo 6. Condicións para o exercicio da actividade

1. A extracción de recursos marisqueiros en zonas suxeitas a plan de xestión ou en zonas de libre marisqueo, só poderá ser exercida polas persoas e embarcacións que estean en posesión da preceptiva habilitación.

2. Os membros das entidades titulares dos plans de xestión e aquelas outras persoas establecidas no plan terán acceso á explotación. Non obstante, no plan poderán recollerse acordos entre as distintas entidades para permitir o acceso dos seus membros.

Artigo 7. Días de actividade

1. As actividades de marisqueo poderán exercerse durante todos os días do ano.

2. A actividade extractiva, con carácter xeral, exercerase de luns a venres, agás festivos autonómicos e nacionais. Poderá realizarse actividade extractiva en días festivos autonómicos e nacionais e en sábados, en supostos extraordinarios e en datas de semana santa e decembro, sempre que se recolla no plan de xestión.

Artigo 8. Extracción e resembrado ou engorde de individuos de tamaño inferior ao regulamentario

A extracción de individuos de tamaño inferior ao regulamentario no ámbito territorial do plan de xestión para a súa nova sementeira en zonas do ámbito doutros plans, ou para engorde en establecementos de cultivos mariños, será autorizada pola xefatura territorial correspondente da consellería competente en materia de marisqueo.



Cando os individuos proveñan de zonas de libre marisqueo non sometidas a plan de xestión, a devandita extracción será autorizada pola dirección xeral competente en materia de marisqueo.

Sección 2ª. Do Plan Xeral de Explotación Marisqueira

Artigo 9. Plan Xeral de Explotación Marisqueira

1. O Plan Xeral de Explotación Marisqueira é o conxunto de normas e orientacións destinadas a regular e programar a conservación e explotación sostible dos recursos marisqueiros xerais durante un período de tres (3) anos.

2. A persoa titular da consellería competente en materia de marisqueo aprobará mediante orde o Plan Xeral de Explotación Marisqueira, que estará integrado por:

- a) Plans de xestión para autorizacións marisqueiras.
- b) Plans específicos de xestión para zonas de libre marisqueo.
- c) Normas de explotación para zonas de libre marisqueo.

Artigo 10. Plans de xestión para zonas de autorización marisqueira

Os plans de xestión para autorizacións marisqueiras serán elaborados polas entidades titulares delas, axustándose ao establecido nos artigos 17 a 19.

Artigo 11. Plans específicos de xestión para zonas de libre marisqueo

1. Cando a explotación dun banco natural sexa susceptible de mellora significativa, a consellería competente en materia de marisqueo autorizará o aproveitamento exclusivo polas entidades de interese colectivo das zonas de libre marisqueo mediante un plan específico de xestión.

O plan deberá incluír medidas que xustifiquen que este sistema de xestión é mellor para a explotación do recurso que a explotación libre do banco natural, e unha proposta de participantes que garanta os dereitos de terceiros afectados.

2. Os plans específicos de xestión serán elaborados polas entidades asociativas do sector axustándose ao establecido nos artigos 17 a 19.



Artigo 12. *Normas de explotación para zonas de libre marisqueo*

1. As normas de explotación para zonas de libre marisqueo, que incluírán a lo menos, o período autorizado para a extracción dos recursos xerais e as cotas de captura para as diferentes especies por zonas, serán elaboradas de oficio pola consellería competente en materia de marisqueo, logo de consulta cos representantes do sector.

2. Aprobadas as devanditas normas, as persoas e embarcacións habilitadas exercerán a actividade marisqueira respectando as disposicións vixentes sobre extracción e comercialización.

3. Excepcionalmente, a dirección xeral competente en materia de marisqueo, en función do estado dos recursos e dos informes técnicos emitidos, modificará as especies, períodos e zonas de extracción de marisco establecidas nas normas de explotación.

Sección 3ª. Dos recursos específicos

Artigo 13. *A conservación e explotación dos recursos específicos*

1. As modalidades de explotación de recursos específicos son: percebe, equinodermos, solénidos, algas, peneira, anémones e poliquetos, así como calquera outra que se determine mediante a aprobación do correspondente plan de xestión.

2. Os plans de xestión serán elaborados polas entidades de interese colectivo, de conformidade co disposto nos artigos 17 a 19, e serán aprobados mediante orde da consellería competente en materia de marisqueo.

Artigo 14. *Percebe*

1. A explotación de percebe realizarase no marco dos plans de xestión presentados por entidades de interese colectivo dentro do seu ámbito territorial, e en caso de ser titulares dunha autorización para esta especie incorporarán a zona de autorización marisqueira sen prexuízo de que supere o seu ámbito territorial.

Tamén poderá presentarse un plan de xestión cuxa zona de produción comprenda parte do ámbito territorial doutra entidade, previa autorización desta.

2. Os plans de xestión de percebe poderán reservar zonas para a extracción de semente de mexillón.



Artigo 15. *Equinodermos*

A explotación do ourizo realizarase no marco dos plans de xestión presentados por entidades de interese colectivo. O período de explotación estará comprendido entre o 2 de xaneiro e o 30 de abril, e entre o 1 de outubro e o 31 de decembro.

Artigo 16. *Algas e argazos*

1. A explotación de algas realizarase no marco dos plans de xestión presentados por entidades de interese colectivo ou empresas de transformación ou comercialización de algas.

2. No caso da explotación de algas por entidades de carácter económico, a recolla será realizada polo seu persoal ou os seus socios/as, inscritos no plan de xestión da empresa.

3. As entidades de interese colectivo terán acceso preferente á conservación e explotación sostible das algas, no marco de plans de xestión.

4. A extracción de argazos realizarase libremente durante todo o ano e non requirirá autorización da consellería competente en materia de marisqueo.

Sección 4ª. Dos plans de xestión de marisqueo de recursos xerais e recursos específicos

Artigo 17. *Participantes*

1. Os plans de xestión establecerán o número máximo de persoas e/ou embarcacións participantes, sen prexuízo das medidas de adaptación establecidas no artigo 21.

2. Cando o número de participantes sexa inferior ao máximo establecido no plan de xestión, a xefatura territorial da consellería competente en materia de marisqueo, incrementará anualmente os participantes no plan ata o máximo establecido, sen prexuízo das medidas de adaptación establecidas no artigo 21.

Artigo 18. *Elaboración, contido e presentación*

1. Os plans de xestión serán elaborados polas entidades interesadas, axustándose ao contido disposto no anexo do presente decreto.

2. Os plans de xestión serán presentados ante a consellería competente en materia de marisqueo, antes do 1 de outubro do ano anterior ao de inicio do plan plurianual.



Artigo 19. *Plans de xestión de nova incorporación*

1. As entidades de interese colectivo poderán presentar plans de xestión para un período inferior a tres anos para recursos, ámbitos zonais ou útiles, equipos e técnicas de marisqueo regulamentarios, diferentes aos plans de xestión trianuais aprobados.

2. Os plans de nova incorporación permitirán determinar a viabilidade da explotación antes da súa aprobación como plan de xestión trianual e incorporación ao Plan Xeral de Explotación Marisqueira, ou como plan de xestión de recursos específicos.

3. Os plans de xestión de nova incorporación deberán ser presentados ante a consellería competente en materia de marisqueo, antes do 1 de outubro do ano anterior ao de inicio.

4. Os plans de xestión de nova incorporación serán aprobados por resolución da persoa titular da consellería competente en materia de marisqueo, determinando o seu período de vixencia que será inferior a tres anos.

Artigo 20. *Desenvolvemento dos plans de xestión*

1. As xefaturas territoriais autorizarán o desenvolvemento da actividade de marisqueo dos plans de xestión, previa petición da entidade titular do plan, e polo tempo establecido nas resolucións de aprobación.

A avaliación continúa dos plans de xestión levarase a cabo mediante o seguimento dos indicadores dos obxectivos operacionais establecidos.

2. Os rareos e traslado de semente, as sementeiras, así como outras actividades de semicultivo necesarias para a mellora de produción ou de recuperación de zonas, poderán levarse a cabo durante tódolos días do ano e requirirán de autorización da xefatura territorial correspondente.

3. Os traballos de limpeza dos bancos marisqueiros realizados polas persoas mariscadoras, poderán levarse a cabo durante tódolos días do ano e requirirán de comunicación previa á xefatura territorial correspondente, e á subdirección xeral de Gardacostas de Galicia.

4. Os traballos ou actividades de coidado, control, seguimento, protección e vixilancia dos bancos marisqueiros, realizados polas persoas mariscadoras, poderán desenvolverse tódolos días do ano.

5. As actividades de turismo mariñeiro realizadas polas persoas mariscadoras, son complementarias e compatibles co exercicio do marisqueo e poderán desenvolverse tódolos días do ano.



Artigo 21. *Adaptación das medidas durante o desenvolvemento do plan*

1. As xefaturas territoriais poderán adaptar medidas para favorecer o cumprimento dos obxectivos do plan, previa consulta co sector, no marco do desenvolvemento dos plans de xestión.
2. A adaptación tamén será realizada polas xefatura territoriais, previa solicitude do sector ante circunstancias que dificulten ou potencien o desenvolvemento do plan, e tendo en conta aspectos biolóxicos, socioeconómicos e de creación de emprego.
3. As medidas de adaptación incluírán:
 - a) As especies.
 - b) O número máximo de participantes.
 - c) Os días máximos anuais previstos.
 - d) Os topes de captura/persoa mariscadora/día ou embarcación para cada especie.
 - e) Novas zonas de traballo secundarias.
 - f) O horario da actividade marisqueira.
 - g) Os tamaños mínimos.
 - h) Outras vinculadas coa actividade marisqueira.

CAPITULO III

Da extracción de moluscos cefalópodos, crustáceos e outros recursos

Artigo 22. *Extracción de moluscos cefalópodos*

1. A consellería competente en materia de marisqueo establecerá as normas de conservación e explotación para moluscos cefalópodos, que incluírán medidas técnicas, e de ser o caso, limitacións de capturas, capacidade e esforzo pesqueiro.
2. Para tódolos moluscos cefalópodos poderase establecer un período de veda que terá en conta principalmente factores biolóxicos de conservación dos diferentes recursos. Para a mesma especie, os devanditos períodos poderán ser distintos nas diferentes zonas de Galicia.





Artigo 23. *Extracción de crustáceos*

1. A consellería competente en materia de marisqueo establecerá as normas de conservación e explotación para tódolos crustáceos distintos ao percebe, que incluirán medidas técnicas, e de ser o caso, limitacións de capturas, capacidade e esforzo pesqueiro.

2. Para tódolos crustáceos distintos do cangrexo real e o percebe, a consellería competente en materia de marisqueo poderá establecer un período de veda que terá en conta principalmente factores biolóxicos de conservación do recurso.

Estes períodos de veda poderán ser distintos en diferentes zonas de Galicia e en zonas específicas de reprodución das especies en cuestión.

Artigo 24. *Outras especies mariñas*

A consellería competente en materia de marisqueo poderá establecer as normas de conservación e explotación relativas a outras especies mariñas, que incluirán medidas técnicas, e de ser o caso, limitacións de capturas, capacidade e esforzo pesqueiro.

Disposición adicional primeira. As modalidades de recursos específicos no permiso de explotación das embarcacións

1. As modalidades de recursos específicos nos permisos de explotación das embarcacións outorgaranse polo período de vixencia do plan de xestión aprobado.

2. Estas modalidades renovaranse por períodos de tres anos, coincidindo coa aprobación do plan de xestión que corresponda, acreditando ter realizado actividade suficiente nos tres anos naturais anteriores.

3. As modalidades que se outorguen ou renoven no ano 2019, e que se outorguen no ano 2020 terán vixencia ata o 31 de decembro de 2021, e renovaranse para o período 2022-2024 acreditando actividade suficiente nos dous anos naturais anteriores.

Disposición adicional segunda. Renovación dos permiso de explotación para marisqueo a pé e modalidades de recursos específicos no permiso de explotación das embarcacións

1. Os días dedicados polas persoas mariscadoras aos rareos, traslados, sementeiras, limpeza e outros traballos de semicultivo necesarios para a mellora da produción e recuperación de zonas, e ás actividades de coidado, control, seguimento, protección e vixilancia dos bancos marisqueiros, poderán computar para a renovación das habilitacións para o exercicio do marisqueo sempre que así se recolla no plan de xestión aprobado.



2. Os días dedicados polas persoas mariscadoras ao turismo mariñeiro computará para a renovación das habilitacións para o exercicio do marisqueo, sempre que dita actividade se contemple no plan de xestión aprobado.

3. Para a renovación dos permisos de explotación para marisqueo a pé acreditarase ter realizado actividade suficiente no ano natural anterior.

Disposición adicional terceira. A explotación de algas polas entidades de carácter económico

Non se incrementará a extracción de algas, mediante novos plans de xestión, polas entidades de carácter económico nas zonas explotadas polas entidades de interese colectivo, ata que se avalíe o impacto da actividade no ecosistema mariño destas zonas.

Disposición transitoria primeira. Prórroga do Plan xeral de explotación marisqueira para o ano 2019

1. O Plan xeral de explotación marisqueira para o ano 2019, aprobado pola Orde de 20 de decembro de 2018, prorrogase ata o 31 de decembro de 2020.

2. Para o ano 2020, o período autorizado para a extracción de recursos marisqueiros xerais nas zonas de libre marisqueo, non suxeitas a plan de xestión específico, será desde o 2 de xaneiro ao 31 de marzo, e desde o 1 de outubro ao 31 de decembro.

3. O número máximo de participantes establecidos nos plans de xestións aprobados no ano 2019 manteranse durante a vixencia prorrogada do plan, a efectos do incremento de participantes establecido no artigo 17.2.

4. As medidas dos plans de xestión serán adaptadas segundo o establecido no artigo 21.

Disposición transitoria segunda. Prórroga dos plans de xestión para recursos específicos aprobados para o ano 2019 pola orde de 20 de decembro de 2018

1. Os plans de xestión regulados pola Orde de 20 de decembro de 2018 pola que se aproban os plans de xestión para recursos específicos en Galicia para o ano 2019, prorroganse ata o 31 de decembro de 2021.

2. O número máximo de participantes establecidos nos plans de xestións aprobados no ano 2019 manteranse durante a vixencia prorrogada do plan, a efectos do incremento de participantes establecido no artigo 17.2.



3. As medidas dos plans de xestión serán adaptadas segundo o establecido no artigo 21.

Disposición transitoria terceira. *Presentación dos plans de xestión de marisqueo de recursos xerais para o período 2021-2023 e de recursos específicos para o período 2022-2024*

1. Os plans de xestión de recursos marisqueiros xerais para o período 2021-2023 presentáranse antes do 1 de outubro do ano 2020.

2. Os plans de xestión de recursos específicos para o período 2022-2024 presentáranse antes do 1 de outubro do ano 2021.

Disposición transitoria cuarta. *Aprobación de plans de xestión de nova incorporación para os anos 2020 e 2021*

1. Poderán presentarse plans de xestión de nova incorporación de recursos xerais para o ano 2020, para recursos, ámbitos zonais ou útiles, equipos ou técnicas de marisqueo regulamentarios diferentes aos de vixencia prorrogada, no prazo dun mes contado desde o día seguinte ao de publicación deste decreto. Estes plans terán vixencia ata o 31 de decembro de 2020.

2. Poderán presentarse plans de xestión de nova incorporación de recursos específicos para o ano 2020 para recursos, útiles, equipos ou técnicas de marisqueo regulamentarios ou ámbitos zonais diferentes aos de vixencia prorrogada, no prazo dun mes contado desde o día seguinte ao de publicación deste decreto. Estes plans terán vixencia ata ao 31 de decembro de 2021.

3. Poderán presentarse plans de xestión de nova incorporación de recursos específicos para o ano 2021 para recursos, útiles, equipos ou técnicas de marisqueo regulamentarios ou ámbitos zonais diferentes aos de vixencia prorrogada, antes do 1 de outubro de 2020. Estes plans terán vixencia ata o 31 de decembro de 2021.

Disposición derogatoria única. *Derogación normativa*

Quedan derogadas tódalas disposicións de igual ou inferior categoría, no que se opoñan ao disposto polo presente decreto, e en particular o título I e a disposición transitoria do Decreto 423/1993, do 17 de decembro, polo que se refunde a normativa vixente en materia de marisqueo, extracción de algas e cultivos mariños.





Disposición derradeira primeira. *Modificación do Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia.*

Suprímese o número 2 do artigo 8 do Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia.

Disposición derradeira segunda. *Modificación da Orde do 15 de xullo de 2011 pola que se regula o permiso de explotación para o marisqueo a pé*

A Orde do 15 de xullo de 2011 pola que se regula o permiso de explotación para o marisqueo a pé, queda modificada como segue:

Un. O número 2 do artigo 11 queda redactado como segue:

“2. Para os efectos de calcular as anteditas porcentaxes teranse en conta as seguintes situacións:

a) Computará como día de actividade o tempo durante o cal a persoa titular permanecese inactiva por causa imprevisible ou inevitable debidamente xustificada, por ter recoñecidos dereitos pola Seguridade Social por ser vítima de violencia de xénero, e por atoparse nalgunha das seguintes situacións protexidas pola Seguridade Social: incapacidade temporal, maternidade ou paternidade, por nacemento de fillo/a, adopción ou acollemento, risco durante o embarazo ou risco durante a lactación natural.

No caso dos/as patróns/oas maiores, presidentes/as das agrupacións sectoriais e presidentes/as das federacións de confrarías, considerarase causa xustificada de inactividade o período de tempo empregado nos labores de representación, cando coincida co día de actividade de marisqueo.

b) Os días adicados polas persoas mariscadoras ás actividades de turismo mariñeiro terán a consideración de días de actividade marisqueira, e computarán para a renovación do permiso de explotación para marisqueo a pé cando coincidan cun día de actividade extractiva.

c) Os días adicados polas persoas mariscadoras a extracción de semente de mexillón computarán para a renovación do permiso de explotación para marisqueo a pé cando coincidan cun día de actividade extractiva.



d) No caso de que unha persoa participe en varios plans de xestión, para renovar o permiso de explotación computará o total de días de traballo autorizados e que fosen efectivos para todos os plans en que participe, sen que poidan contabilizar días de actividade por duplicado.

Dous. Engádense as letras g) e h) ao do número 3 do artigo 12, coa seguinte redacción:

“g) Para acreditar a realización de actividades de turismo mariñeiro, un certificado da entidade titular do plan de xestión en que se faga constar os días dedicados a esta actividade. O documento será asinado polo/a presidenta/e da agrupación sectorial, de estar constituída, ou, en caso contrario, pola persoa representante da confraría ou entidade asociativa.

h) Para acreditar a realización da actividade de extracción de semente de mexillón polas persoas mariscadoras, un certificado da confraría ou entidade asociativa en que se faga constar os días dedicados a esta actividade.”

Disposición derradeira terceira. *Modificación da Orde do 30 de decembro de 2015 pola que se regula a explotación dos recursos específicos no ámbito da Comunidade Autónoma de Galicia*

A Orde do 30 de decembro de 2015 pola que se regula a explotación dos recursos específicos no ámbito da Comunidade Autónoma de Galicia queda modificada como segue:

Un. O número 2 do artigo 16 queda redactado como segue:

“2. Para os efectos de calcular as anteditas porcentaxes teranse en conta as seguintes situacións:

a) Computará como día de actividade o tempo durante o cal a persoa titular permanecese inactiva por causa imprevisible ou inevitable debidamente xustificada, por ter recoñecidos dereitos pola Seguridade Social por ser vítima de violencia de xénero e por atoparse nalgunha das seguintes situacións protexidas pola Seguridade Social: incapacidade temporal, maternidade ou paternidade, por nacemento de fillo/a, adopción ou acollemento, risco durante o embarazo ou risco durante a lactación natural.

No caso dos/as patróns/oas maiores, presidentes/as das agrupacións sectoriais e presidentes/as das federacións de confrarías, considerarase causa xustificada de inactividade o período de tempo empregado nos labores de representación, cando coincida co día de actividade de marisqueo.



b) Os días adicados polas persoas mariscadoras ás actividades de turismo mariñeiro terán a consideración de días de actividade de marisqueo, e computarán para a renovación do permiso de explotación a pé para recursos específicos cando coincidan cun día de actividade extractiva.

c) Os días adicados polas persoas percebeiras a extracción de semente de mexillón computarán para a renovación do permiso de explotación a pé para percebe cando coincidan cun día de actividade extractiva.

d) No caso do percebe, non se computarán como días de actividade efectiva aqueles en que se acredite que traballaron menos do 15% das persoas con permiso de explotación para percebe a pé.

e) No caso de que unha persoa participe en varios plans de xestión, para renovar o permiso de explotación computarse o total dos días de traballo autorizados e que fosen efectivos para todos os plans en que participe, sen que se poidan contabilizar días de actividade por duplicado.”

Dous. Engádense as letras f) e g) ao número 4 do artigo 18, coa seguinte redacción:

“f) Para acreditar a realización de actividades de turismo mariñeiro, un certificado da entidade titular do plan de xestión en que se faga constar os días dedicados a esta actividade. O documento será asinado polo/a presidenta/e da agrupación sectorial, de estar constituída, ou, en caso contrario, pola persoa representante da confraría ou entidade asociativa.”

g) Para acreditar a realización da actividade de extracción de semente de mexillón polas persoas percebeiras a pé, un certificado da confraría ou entidade asociativa en que se faga constar os días dedicados a esta actividade.”

Tres. O número 1 do artigo 24 queda redactado como segue:

“1. As modalidades de recursos específicos no permiso de explotación da embarcación outórganse pola vixencia do plan de xestión para o que foron aprobadas e renóvanse por un período de tres anos, coincidindo coa aprobación do correspondente plan de xestión.”

Catro. O número 2 do artigo 31 queda redactado como segue:

“2. As cotas de captura asignadas revisaranse cada tres anos coa renovación da modalidade de recursos específicos para axustalas ao número de tripulantes con dereito á cota da embarcación que estiveron enrolados/as nos tres anos naturais anteriores.”



Cinco. O artigo 32 queda redactado como segue:

“Artigo 32. *Requisitos para a renovación*

1. A renovación das modalidades de recursos específicos no permiso de explotación da embarcación realizarase cada tres anos e requirirá:

a) Cumprir as prescricións específicas contidas nos plan de xestión.

b) Que cando menos unha das persoas tripulantes enroladas estea en posesión dos certificados profesionais correspondentes.

c) Acreditar ter realizado actividade suficiente nos tres anos naturais anteriores, entendendo como tal aquela que se realiza de modo efectivo segundo se indica a seguir, e sen prexuízo de que o plan de xestión do recurso específico que corresponda poida recoller unha porcentaxe superior:

1º. Ter realizado un 15 % dos días que foron efectivamente autorizados para a extracción dentro dun plan de xestión da entidade, no caso de embarcacións que só dispoñan dunha modalidade de recursos específicos no permiso de explotación.

2º. Ter realizado un 8 % dos días que foron efectivamente autorizados para a extracción dentro dun plan de xestión da entidade, no caso de embarcacións que dispoñan de dúas modalidades de recursos específicos no permiso de explotación.

3º. Ter realizado un 5 % dos días que foron efectivamente autorizados para a extracción dentro dun plan de xestión da entidade, no caso de embarcacións que dispoñan de tres ou máis modalidades de recursos específicos no permiso de explotación.

4º. Do 95 % dos días efectivos dos autorizados dentro dun plan de xestión da entidade para as actividades de semicultivo asignados á embarcación que son necesarias para a mellora da produción; así como dos traballos de control, protección e vixilancia dos bancos marisqueiros que foron autorizados con carácter xeral no marco do plan de xestión. Os días empregados nas actividades anteriores computaranse para os efectos de renovación da modalidade, sempre que así estea recollido nun plan de xestión aprobado.

2. Para os efectos de calcular as anteditas porcentaxes, teranse en conta as seguintes situacións:

a) Descontarase do período autorizado o tempo durante o cal a embarcación permanecese inactiva por causa debidamente xustificada.



b) Non se computarán como día de actividade efectiva aqueles en que se acredite que traballaron menos do 15 % das embarcacións autorizadas.

c) Os días adicados polas persoas mariscadoras ás actividades de turismo mariñeiro terán a consideración de días de actividade marisqueira, e computarán para a renovación das modalidades de recursos específicos no permiso de explotación da embarcación cando coincidan cun día de actividade extractiva.

d) Os días adicados polas persoas percebeiras a extracción de semente de mexillón computarán para a renovación da modalidade de percebe no permiso de explotación da embarcación, cando coincidan cun día de actividade extractiva.

3. No caso dos plans de xestión nos cales o cálculo do esforzo pesqueiro se faga en función das persoas tripulantes, coa renovación da modalidade axustarase o número de cotas de captura da embarcación á media de tripulantes que estivesen enrolados/as durante os tres últimos anos naturais.

Para os efectos de calcular a media, descontarase o tempo durante o cal a tripulación non estivo enrolada por causa debidamente xustificada.

4. No caso dos/as patróns/oas maiores, presidentes/as das agrupacións sectoriais e presidentes/as das federacións de confrarías, considerarase causa xustificada de inactividade o período de tempo empregado nos labores de representación, cando coincida co día de actividade de marisqueo.

5. As entidades asociativas xustificarán a inactividade da embarcación ou da tripulación cando se deba a causas conxunturais, como poden ser, entre outras, as relacionadas coa produción ou con causas organizativas que afectan os métodos de traballo.”

Seis. O número 1 do artigo 33 queda redactado como segue:

“1. A renovación das modalidades de recursos específicos no permiso de explotación das embarcacións realizarase cada tres anos e levarase a cabo segundo o calendario que para cada provincia e entidade asociativa do sector se estableza por resolución da xefatura territorial da Consellería do Mar. Na resolución farase constar o prazo para presentar as solicitudes.”

Sete. As letras c), d) e e) do número 4 do artigo 34 quedan redactadas como segue:

“c) Para acreditar o recollido no artigo 32.1.a) e c) 4º, un certificado da agrupación sectorial, de estar constituída, e da entidade titular do plan de xestión relativo á:



1º. Porcentaxe dos días dedicados, nos tres anos naturais anteriores, ás actividades de semicultivo, aos traballos de control, protección e vixilancia dos bancos marisqueiros, que exprese as datas dedicadas ás tarefas. Así mesmo, incluírase a información necesaria sobre o desenvolvemento das actividades, que permita calcular que se cumpre a porcentaxe necesaria para renovar a modalidade.

2º. O cumprimento das prescricións específicas dos plans nos tres anos naturais anteriores.

d) Para acreditar o recollido no artigo 32.1.c) 1º, 2º e 3º, a información relativa ás vendas en lonxa ou punto de venda autorizado realizadas durante os tres anos naturais inmediatamente anteriores será a que figure en poder da consellería do Mar.

e) Rol de despachos actualizado da embarcación coa dotación de tripulación enrolada nela nos tres anos naturais anteriores. ”

Oito. Engádense as letras h) e i) ao número 4 do artigo 34, coa seguinte redacción:

“h) Para acreditar a realización de actividades de turismo mariñeiro, un certificado da entidade titular do plan de xestión en que se faga constar os días dedicados a esta actividade. O documento será asinado polo/a presidenta/e da agrupación sectorial, de estar constituída, ou, en caso contrario, pola persoa representante da confraría ou entidade asociativa.

i) Para acreditar a realización da actividade de extracción de semente de mexillón polas persoas percebeiras, un certificado da confraría ou entidade asociativa en que se faga constar os días dedicados a esta actividade.”

Nove. O artigo 53 queda redactado como segue:

“Artigo 53. *Elaboración*

Os plans de xestión serán elaborados e presentados polas confrarías ou entidades asociativas do sector antes do 1 de outubro do ano anterior ao de inicio do plan.”

Dez. O artigo 54 queda sen contido.

Once. O artigo 58 queda redactado como segue:

“Artigo 58. *Desenvolvemento dos plans de xestión*



1. As xefaturas territoriais segundo o ámbito da súa competencia autorizarán as actividades para o desenvolvemento dos plans de xestión aprobados, e polo tempo establecido nas resolucións de autorización.

2. As xefaturas territoriais poderán adaptar as medidas do plan de xestión establecidas no artigo 21.3 do Decretode 2019, polo que se regula o réxime de conservación e explotación dos recursos marisqueiros.

3. As xefaturas territoriais adaptarán as medidas do plan de xestión, previa consulta ao sector, en función dos datos de seguimento dos indicadores dos obxectivos establecidos no plan, e cando exista:

a) Informe emitido polo persoal técnico da consellería.

b) Proposta de adaptación da xefatura territorial á/ás entidade/s titular/es do plan de xestión.

4. As xefaturas territoriais adaptarán as medidas do plan de xestión, previa petición do sector, ante circunstancias que dificulten o ben permitan potenciar o desenvolvemento do plan de xestión e tendo en conta aspectos biolóxicos, socioeconómicos e de creación de emprego, cando exista:

a) Solicitude motivada da entidade titular do plan de xestión avalada por informe do seu técnico.

b) Informe favorable emitido polo persoal técnico da consellería. “

Doce. O número 4 do artigo 59 queda redactado como segue:

“4. Xunto á solicitude, achegaranse os datos de explotación necesarios para o seguimento e xestión dos bancos, de acordo coas indicacións da consellería.

Non obstante, non será necesaria a achega destes datos sempre e cando estean dispoñibles na páxina de seguimento técnico habilitada para a consulta desta información.”

Disposición derradeira cuarta. Modificación da Orde do 20 de decembro de 2018 pola que se aproba o Plan xeral de explotación marisqueira para o ano 2019

A Orde do 20 de decembro de 2018 pola que se aproba o Plan xeral de explotación marisqueira para o ano 2019, queda modificada como segue:





Un. O artigo 7 queda redactado como segue:

“Artigo 7. Adaptación das medidas durante o desenvolvemento do plan

1. As xefaturas territoriais poderán adaptar as medidas do plan de xestión establecidas no artigo 21 do Decretode 2019, polo que se regula o réxime de conservación e explotación dos recursos marisqueiros.

2. As xefaturas territoriais adaptarán as medidas do plan de xestión, previa consulta ao sector, en función dos datos de seguimento dos indicadores dos obxectivos establecidos no plan, e cando exista:

a) Informe emitido polo persoal técnico da consellería.

b) Proposta de adaptación da xefatura territorial á/ás entidade/s titular/es do plan de xestión.

3. As xefaturas territoriais adaptarán as medidas do plan de xestión, previa petición do sector, ante circunstancias que dificulten o ben permitan potenciar o desenvolvemento do plan de xestión, e tendo en conta aspectos biolóxicos, socioeconómicos e de creación de emprego, cando exista:

a) Solicitude motivada da entidade titular do plan de xestión avalada por informe do seu técnico.

b) Informe favorable emitido polo persoal técnico da consellería.”

Dous. O número 1 do artigo 11 queda redactado como segue:

“1.As entidades asociativas do sector dirixirán as súas solicitudes á dirección xeral competente en materia de marisqueo antes do 1 de outubro”.

Tres. O artigo 13 queda redactado como segue:

“Artigo 13. Aprobación

Os plans de xestión serán aprobados mediante orde da Consellería do Mar, con anterioridade ao inicio do plan”.



Disposición derradeira quinta. *Ordes modificadas polo presente decreto*

As previsións das ordes que son obxecto de modificación polo presente decreto poderán ser modificadas por orde da persoa titular da consellería competente en materia de marisqueo.

Disposición derradeira sexta. *Competencias de desenvolvemento*

Facúltase á persoa titular da consellería competente en materia de marisqueo para ditar, dentro do ámbito das súas competencias, as disposicións necesarias para o desenvolvemento deste decreto.

Disposición derradeira sétima. *Entrada en vigor*

O presente decreto entrará en vigor ó día seguinte ao da súa publicación no Diario Oficial de Galicia.

Santiago de Compostela,

ANEXO

Contido dos plans de xestión

1. Obxectivos xerais e operacionais a tres anos, indicadores e estratexias de actuación para acadar unha xestión sostible.

- a) Obxectivos biolóxicos
- b) Obxectivos ecolóxicos
- c) Obxectivos socio económicos.
- d) Indicadores anuais para os obxectivos operacionais.
- e) Niveis de referencia anuais para os obxectivos operacionais.

Os indicadores anuais para os obxectivos biolóxicos e ecolóxicos operacionais estarán relacionados a lo menos coa estrutura de tamaños dos stocks explotados ou das capturas e/ou volume dos stocks.

- f) Estratexia de actuación para os obxectivos operacionais.

2. Participantes.

- a) Número de persoas mariscadoras ou embarcacións actuais.
- b) Número máximo de persoas mariscadoras ou embarcacións.

3. Avaliación dos recursos.

4. Plan de extracción e medidas de conservación.

- a) Listaxe de especies obxectivo.
- b) Ámbito do plan.
- c) Horario de actividade.
- d) Artes a empregar.
- e) Tamaños mínimos.
- f) Calendario anual previsto de extracción incluíndo o número probable de días.



- g) Cotas de captura por especie previstas por persoa mariscadora e día ou embarcación.
 - h) Puntos de control.
5. Accións de conservación, mantemento, recuperación ou mellora dos hábitats e zonas de produción.
- a) Accións previstas: limpeza, rareos, traslados, acondicionamento do substrato, control de depredadores, control de especies exóticas, etc.
 - b) Épocas e zonas previstas.
 - c) Metodoloxía a empregar.
6. Accións de coidado, control, seguimento, protección e vixilancia dos bancos marisqueiros.
7. Información ambiental.
8. Perspectiva sistémica: biodiversidade, uso do territorio, cambio climático e infraestrutura verde.
9. Plan de comercialización.
- a) Lonxa e/ou centro de venda.
 - b) Normas de comercialización.
10. Accións formativas para unha mellor xestión e conservación dos recursos marisqueiros.
11. Actividades de diversificación da actividade marisqueira coa fórmula de turismo mariñeiro.
12. Plan financeiro a tres anos:
- a) Gastos previstos de xestión e investimentos.
 - b) Ingresos previstos: cotas, porcentaxes de ingresos a reter, subvencións e outras axudas.